

## **Memorandwm Esboniadol i Reoliadau Tenantiaethau Busnes (Estyn Gwarchodaeth rhag Fforffediad etc.) (Cymru) (Coronafeirws) 2021**

Lluniwyd y Memorandwm Esboniadol hwn gan Grŵp yr Economi, Sgiliau a Chyfoeth Naturiol ac fe'i gosodir gerbron Senedd Cymru ar y cyd â'r is-ddeddfwriaeth uchod ac yn unol â Rheol Sefydlog 27.1.

### **Datganiad y Gweinidog**

Yn fy marn i, mae'r Memorandwm Esboniadol hwn yn rhoi darlun teg a rhesymol o effaith ddisgwyliedig Rheoliadau Tenantiaethau Busnes (Estyn Gwarchodaeth rhag Fforffediad etc.) (Cymru) (Coronafeirws) 2021. Rwyf wedi fy modloni bod y manteision yn cyfiawnhau'r costau tebygol.

**Ken Skates AS**

**Gweinidog yr Economi, Trafnidiaeth a Gogledd Cymru  
9 Mawrth 2021**

## **RHAN 1**

### **1. Disgrifiad**

Mae'r Rheoliadau hyn yn gwneud darpariaeth i ymestyn hyd y moratoriwm a ddarperir gan adran 82 o Ddeddf y Coronafeirws (2020) ("y Ddeddf"), lle na chaniateir gorfodi, drwy weithred neu fel arall, hawl i ailfynediad neu fforffediad, dan denantiaeth busnes berthnasol, am beidio â thalu rhent.

### **2. Materion o ddiddordeb arbennig i'r Pwyllgor Deddfwriaeth, Cyfiawnder a'r Cyfansoddiad**

Mae gan Weinidogion Cymru gymhwysedd gweithredol I Iunio'r Rheoliadau hyn yn ôl adran 82 Deddf Coronafeirws 2020 ("y Ddeddf"). Mae Adran 82(12) y Ddeddf yn diffinio y "cyfnod perthnasol" fel un "a ddaw I ben ar 30 Mehefin 2020 neu ddyddiad hwyrach fel a nodir gan yr awdurdod cenedlaethol yn y rheoliadau a wnaethpwyd gan offeryn statudol (a gellir defnyddio'r pŵer hwnnw ar fwy nag un achlysur fel bod y cyfnod yn cael ei ymestyn ymhellach)". Mae Adran 82(12) o'r Ddeddf yn cadarnhau ymhellach bod yr "awdurdod cenedlaethol perthnasol" yn golygu Gweinidogion Cymru, yng nghyd-destun Cymru.

### **3. Cefndir deddfwriaethol**

Mae adran 82 o'r Ddeddf yn gwneud darpariaeth na chaniateir gorfodi, drwy achos neu fel arall, hawl i ailfynediad neu fforffediad, o dan denantiaeth fusnes berthnasol, am beidio â thalu rhent, yn ystod y "cyfnod perthnasol". Mae adran 82(12) o'r Ddeddf yn diffinio bod y "cyfnod perthnasol" yn dechrau y diwrnod ar ôl y diwrnod y pasiwyd y Ddeddf, ac yn gorffen ar 30ain Mehefin 2020, neu ddyddiad diweddarach a bennir gan yr awdurdod cenedlaethol perthnasol mewn rheoliadau. Gellir arfer y pŵer i bennu dyddiad diweddarach ar fwy nag un achlysur er mwyn ymestyn y "cyfnod perthnasol" ymhellach.

Gweinidogion Cymru yw'r "awdurdod cenedlaethol perthnasol" mewn perthynas â Chymru, a gallant felly wneud rheoliadau i ymestyn y "cyfnod perthnasol" i warchodaeth y tu hwnt i 30ain Mehefin 2020, a thrwy hynny gadw'r warchodaeth a ddarperir gan adran 82 y Ddeddf i'r ddyddiad diweddarach a nodir yn y rheoliadau.

Mae'r Rheoliadau sydd mewn grym ar hyn o bryd, Y Rheoliadau Tenantiaethau Busnes (Estyn Gwarchodaeth rhag Fforffediad etc.) (Cymru) (Coronafeirws) (Rhif 3) 2020 yn ymestyn y "cyfnod perthnasol" tan 31 Mawrth 2021.

Mae'r Rheoliadau hyn yn dilyn gweithdrefn penderfyniad negyddol y Senedd.

### **4. Pwrpas a'r effaith a fwriedir ar y deddfwriaeth**

Pwrpas y Rheoliadau yw i nodi bod y "cyfnod perthnasol", fel a ddiffinir gan adran 82(12) y Ddeddf, yn dod i ben ar 30 Mehefin 2021 yng Nghymru.

Effaith y Rheoliadau yw ymestyn y “cyfnod perthnasol” pryd na fydd hawl ailfynediad a fforffediad, o dan y denantiaeth fusnes berthnasol, ar gyfer peidio talu rhent yn cael ei orfodi, drwy unrhyw gamau neu fel arall am 3 mis arall hyd at 30 Mehefin 2021.

## **RHAN 2 – ASESIAD EFFAITH RHEOLEIDDIOL**

### **5. Opsiynau**

Mae pedwar opsiwn wedi cael eu hystyried:

Opsiwn 1: Gwneud dim – Caniatáu i'r ddarpariaeth sy'n diogelu tenantiaid masnachol rhag cael eu troi allan oherwydd peidio â thalu rhent i ddod i ben ar 31ain Mawrth 2021.

Opsiwn 2: Gwneud Rheoliadau i ymestyn y warchodaeth am 1 mis arall hyd at 30ain Ebrill 2021.

Opsiwn 3: Gwneud Rheoliadau i ymestyn y warchodaeth am 3 mis arall hyd at 30ain Mehefin 2021. Dyma'r opsiwn a ffeifir.

Opsiwn 4: Gwneud Rheoliadau i ymestyn y warchodaeth am 6 mis arall hyd at 30ain Medi 2021.

### **Costau a buddiannau**

Mae goblygiadau ariannol posibl yn gysylltiedig â'r ddau opsiwn. Gydag opsiwn 2, 3 a 4 efallai y bydd pwysau cynyddol ar i Weinidogion Cymru ddarparu cymorth ariannol ychwanegol i landlordiaid masnachol yn ystod y cyfnod hwn i wrthweithio'r warchodaeth a ddarperir i denantiaid. Y bwriad wrth ymestyn y warchodaeth yw hwyluso ailddechrau'r economi drwy geisio sicrhau bod busnesau yn dal mewn sefyllfa i weithredu pan gaiff y cyfyngiadau presennol eu codi.

Fodd bynnag, caiff yr asesiad ei atodi gan ddata o'r [Arolwg o Effaith y Coronafeirws \(COVID-19\) ar Fusnesau \(BICS\)](#) gwirfoddol bob pythefnos. Caiff ei gynnal gan y Swyddfa Ystadegau Gwladol, sy'n casglu barn busnesau am effaith y coronafeirws (COVID-19) ar drosiant, prisiau'r gweithlu, cadernid masnach a busnes.

Mae'r atodiad yn cynnwys rhagor o wybodaeth am yr arolwg a dylid edrych ar y canfyddiadau yng nghyd-destun yr wybodaeth hon. Dylid nodi er bod y data yn gymharol amserol, mae sefyllfa COVID-19 yn newid yn gyflym felly mae'n bosibl y bydd prif negeseuon yr arolwg yn newid yn gyflym iawn. Hefyd, nid yw'r arolwg yn edrych ymlaen felly nid yw cyflwr a'r effaith a gaiff ar fusnesau yn y dyfodol yn cael eu cynnwys. Mae'r arolwg yn wirfoddol ac efallai mai dim ond adlewyrchu nodweddion y rhai hynny a ymatebodd a fydd; mae'r canlyniadau yn arbrofol.

**Opsiwn 1: Gwneud dim – Caniatáu i'r ddarpariaeth sy'n diogelu tenantiaid masnachol rhag achosion fforffedu oherwydd peidio â thalu rhent i ddod i ben ar 31ain Mawrth 2021.**

Heb lunio Rheoliadau diwygio, daw'r warchodaeth i ben ac o ganlyniad mae mwy o risg y gallai tenantiaid masnachol gael eu troi allan o'u heiddo am beidio â thalu rhent. Gan mai prif nod y ddeddfwriaeth wreiddiol oedd diogelu tenantiaid masnachol a swyddi, byddai dileu'r warchodaeth bresennol yn golygu bod y tenantiaid masnachol hynny - rhai ohonynt efallai wedi cael cymorth ariannol gan Lywodraethau Cymru a'r DU - mewn perygl eto wrth i'r economi wella.

Un o ganlyniadau'r opsiwn hwn yw y bydd landlordiaid masnachol yn rhydd i gymryd camau oherwydd peidio â thalu rhent. Bydd hyn yn arwain un ai at dalu rhywfaint o'r rhent neu'r holl rent sy'n ddyledus gan denantiaid masnachol, neu achosion fforffedu. Fodd bynnag, oherwydd ansicrwydd yr hinsawdd economaidd bresennol, byddai angen i landlordiaid ystyried yn ofalus a fyddent yn elwa'n ariannol gan na fyddai tenantiaid efallai yn gallu gwneud y taliadau angenrheidiol beth bynnag. Gallai fod yn anodd dod o hyd i denant arall, neu werthu'r eiddo, gan fod y galw am ofod masnachol mewn rhai sectorau (e.e. hamdden, adwerthu a lletygarwch) yn debygol o fod wedi lleihau, o leiaf yn y tymor byr.

Mae'r canlyniadau o Don 16 arolwg ONS BICS yn cynnwys y cyfnod **25 Ionawr hyd at 7 Chwefror 2021**. Mae'n dangos, o'r busnesau oedd heb roi'r gorau i fasnachu yn gyfan gwbl, roedd 67% o fusnesau yng Nghymru wedi gwneud cais ar gyfer y Cynllun Cadw Swyddi o ganlyniad i'r Coronafeirws, o gymharu gydag 67% o fusnesau yn yr Alban, 62% yng Ngogledd Iwerddon ac yn Lloegr.

Mae busnesau yng Nghymru hefyd wedi defnyddio ystod eang o gynlluniau'r llywodraeth yn ystod yr argyfwng. Mae'r rhain yn cynnwys:

- Grantiau busnes wedi'u hariannu gan y DU a llywodraethau datganoledig;
- Benthyciadau achrededig neu gytundebau cyllidol wedi'u cefnogi gan y Llywodraeth; a
- Cynllun Swyddi Kickstart ar gyfer pobl ifanc yn ogystal â'r Cynllun Cadw Swyddi o ganlyniad i'r Coronafeirws.

O'r busnesau sydd heb roi'r gorau i fasnachu yn gyfan gwbl, nid oedd 63% o'r rhai hynny oedd yn gweithredu yng Nghymru wedi gwneud cais am unrhyw un o'r benthyciadau neu'r cynlluniau cyllid wedi'u cefnogi gan y llywodraeth, mae hyn yn cymharu â 65% yn Lloegr, 61% yng Ngogledd Iwerddon a 66% yn Yr Alban. Hefyd, o'r busnesau sydd heb roi'r gorau i fasnachu yn barhaol, ac sydd wedi gwneud cais am grant gan y llywodraeth yng Nghymru, ni dderbyniodd 11% mohono. Mae hyn yn cymharu â 7% yng Ngogledd Iwerddon, 16% yn yr Alban ac 11% yn Lloegr.

Y casgliad yw na fyddai Opsiwn 1 yn cyflawni'r amcan polisi o gefnogi busnesau a diogelu tenantiaid masnachol rhag fforffediad yn ystod pandemig y Coronafeirws.

### **Opsiwn 2 - Gwneud Rheoliadau i ymestyn y warchodaeth am 1 mis arall hyd at 30ain Ebrill 2021**

Byddai ymestyn y ddarpariaeth am gyfnod byr – sef mis – yn lleihau'r baich ar landlordiaid, ac nid yw'r opsiwn hwn yn debygol o fod yn ddigon i ddangos i economi Cymru bod fframwaith sylweddol ar gael i ganiatáu i fusnesau addasu.

Hefyd, byddai ymestyn y cyfnod hwn yn lleihau'r gallu i Lywodraeth Cymru ddatblygu cyfres mwy cynaliadwy o gynigion.

### **Opsiwn 3: Gwneud Rheoliadau i ymestyn y warchodaeth am 3 mis arall hyd at 30 Mehefin 2021.**

Mae'r Coronafeirws wedi lleihau gweithgarwch economaidd, gan arwain at ostyngiad mewn incwm i lawer o fusnesau. Mae arolwg ONS y Cyngor Prydeinig-Gwyddelig yn dangos:

- Bod 47% o fusnesau yng Nghymru wedi nodi gostyngiad mewn trosiant y tu allan i'r ystod arferol. Mae hyn yn cymharu â 45% yn yr Alban, 45% yn Lloegr a 39% yng Ngogledd Iwerddon.
- Ar draws pob busnes sy'n masnachu ar hyn o bryd yng Nghymru, roedd 10% yn datgan bod elw wedi gostwng dros 50%. Dywedodd 12% bod elw wedi gostwng rhwng 20-50% a dywedodd 20% bod elw wedi gostwng hyd at 20%.
- Wledydd y DU, Cymru sydd â'r drydedd gyfran uchaf o fusnesau gyda mwy na chwe mis o gronfa arian parod ar 36%. Mae hyn yn cymharu â 40% yn Yr Alban, 36% yn Lloegr a 34% Ngogledd Iwerddon.
- Roedd gan 44% o fusnesau yng Nghymru lai na 60% o gronfa arian parod, yn is na'r ffigur cyffredinol ar gyfer y DU o 43%. Roedd oddeutu 4% o fusnesau Cymru yn nodi nad oedd ganddynt gronfa arian parod.

#### *Ansolfedd:*

Yng Nghymru, o fusnesau sydd heb roi'r gorau i fasnachu yn barhaol, roedd:

- 1% mewn perygl difrifol o ansolfedd
- 14% mewn risg cymhedrol o ansolfedd
- 52% mewn risg isel o ansolfedd
- 24% heb unrhyw risg o ansolfedd

#### *Hyder yn y busnes:*

Yng Nghymru, o'r busnesau sy'n masnachu ar hyn o bryd mae:

- 59% yn hyderus iawn y byddant yn goroesi yn y tri mis nesaf;
- 31% yn weddol hyderus y byddant yn goroesi yn y tri mis nesaf;
- 4% ddim yn hyderus iawn y byddant yn goroesi yn y tri mis nesaf.

#### *Cau safleoedd:*

Yng Nghymru, o'r busnesau sy'n masnachu ar hyn o bryd, mae:

- 4% yn bwriadu cau rhai safleoedd busnes yn barhaol;
- 81% ddim yn bwriadu cau unrhyw safleoedd busnes yn barhaol

## *Gwariant cyfalaf<sup>1</sup>*

Mae'n ymddangos bod busnesau yng Nghymru hefyd wedi gweld effaith y Coronafeirws ar eu gwariant cyfalaf.

Yn nhon 23 o'r BICS (11 Ionawr tan 24 Ionawr 2021), o'r holl fusnesau sy'n parhau i fasnachu yng Nghymru, roedd 11% yn nodi bod eu gwariant cyfalaf wedi dod i ben, tra bod 29% yn nodi bod gwariant cyfalaf wedi bod yn is na'r arferol.

Bydd yr opsiwn hwn yn galluogi Llywodraeth Cymru i barhau i ddiogelu tenantiaid masnachol yn ystod y cyfnod hwn o ansicrwydd, ond nid yw ychwaith yn dileu gormod ar yr hawliau a'r rhwymedigaethau sy'n galluogi landlordiaid i weithredu mewn achosion o beidio â thalu rhent.

Mae'r sector a'r farchnad eiddo masnachol yn chwarae rhan bwysig yn yr economi ac o ran gwireddu a darparu seilwaith hanfodol i fusnesau ar ffurf adeiladau masnachol lle gall busnesau weithredu a thyfu. Felly, mae'n bwysig cydnabod anghenion busnesau landlordiaid a thenantiaid.

Nid yw'r warchodaeth hon yn dileu'r gofyniad i dalu rhent, ond yn gohirio hawl landlord i gymryd camau fforffedu am beidio â thalu rhent. Bydd tenantiaid yn dal i fod yn atebol am unrhyw ôl-ddyledion, a bydd rhaid iddynt dalu unrhyw rent sy'n ddyledus unwaith y caiff y warchodaeth ei chodi neu wynebu camau fel fforffedu. Ni fydd gweithredoedd y landlord yn ei atal rhag arfer hawl i fforffediad yn y dyfodol, ar ôl i'r moratoriwm ddod i ben, oni bai fod y landlord a'r tenant wedi cytuno fel arall drwy gytundeb gohirio rhent neu gytundeb tebyg mewn perthynas â thalu rhent.

Wrth argymhell Opsiwn 3, mae Llywodraeth Cymru yn cydnabod sefyllfa landlordiaid, fel buddsoddwyr mewn seilwaith busnes hollbwysig a darparwyr. Bydd darpariaethau Opsiwn 3 yn parhau i roi landlordiaid o dan rywfaint o anfantais wrth negodi trefniadau gohirio rhent er mwyn lliniaru helyntion presennol tenantiaid wrth geisio diogelu eu hasedau.

### **Opsiwn 4: Gwneud Rheoliadau i ymestyn y warchodaeth am 6 mis arall hyd at 30 Medi 2021.**

Byddai Opsiwn 4 yn rhoi mwy o amser i fusnesau yng Nghymru adfer a gwella eu gallu i dalu rhent. Mae Llywodraeth Cymru wedi amlinellu dull gofalus ac ystyriol o lacio cyfyngiadau ar yr economi. Er bod hyn yn edrych yn optimistaidd, mae'n cael ei gydnabod y byddai gallu o'r fath i dalu rhent yn cael ei gyfyngu tan bod gan fusnesau hawl i weithredu ac mae'n bosibl y bydd nifer yn parhau i weld heriau o ran llif arian. O ystyried hyn, byddai Opsiwn 4 yn caniatâu cyfnod i fusnesau ddod atynt eu hunain.

Nid yw'r warchodaeth hon yn dileu'r gofyniad i dalu rhent, ond yn gohirio hawl landlord i gymryd camau fforffedu am beidio â thalu rhent. Bydd tenantiaid yn dal i fod yn atebol am unrhyw ôl-ddyledion, a bydd rhaid iddynt dalu unrhyw rent sy'n

---

<sup>1</sup> Mae'r ffigurau sy'n gysylltiedig â nifer y cwsmeriaid o BICS Ton 23 (i gynnwys y cyfnod rhwng 25 Ionawr a 7 Chwefror) gan nad yw Ton 24 yn cynnwys y ffigurau hyn.

ddyledus unwaith y caiff y warchodaeth ei chodi neu wynebu camau fel fforffedu. Ni fydd gweithredoedd y landlord yn ei atal rhag arfer hawl i fforffediad yn y dyfodol, ar ôl i'r moratoriwm ddod i ben, oni bai fod y landlord a'r tenant wedi cytuno fel arall drwy gytundeb gohirio rhent neu gytundeb tebyg mewn perthynas â thalu rhent.

Fodd bynnag, gan bod y Rheoliadau hyn yn cael eu hystyried yn ymateb brys i'r pandemig, gallai'r cyfnod amser hwn roi pwysau sylweddol ar landlordiaid a buddsoddwyr. Yn ogystal â rhoi mwy o heriau i landlordiaid a buddsoddwyr, mae'n debygol o ddangos diffyg hyder yn yr ymdrechion i adfer yr economi.

## **6. Ymgynghoriad**

Cafodd ymarfer cysylltu gyda prif randdeiliaid i ddeall yr effaith a gafodd Rheoliadau Tenantiaethau Busnes (Estyn Gwarchodaeth rhag Fforffediad etc.) (Cymru) (Coronafeirws) (Rhif 3) 2020 ar denantiaid a landlordiaid masnachol yng Nghymru ei gynnal, gan ddod i ben ym mis Chwefror 2021.

Cawsom nifer o sylwadau gan randdeiliaid ac i grynhoi y prif bwyntiau a wnaethpwyd oedd:

- Ers yr estyniad blaenorol, gosodwyd cyfyngiadau sylweddol ar fusnesau drwy lefel rhybudd 4. Byddai caniatáu i'r darpariaethau ddod i ben ar hyn o bryd yn rhoi tenantiaid masnachol mewn perygl mawr.
- Mae llawer o fusnesau'n pryderu am eu hyfywedd a'u rhagolygon.
- Mae rhai cwmnïau oportiwnistaidd a allai fod yn manteisio ar y moratoriwm, er gwaethaf y gallu i dalu.
- Bydd Cynllun Seibiant Dyledion Llywodraeth y DU yn rhoi'r hawl i rywun sydd â dyledion problemus gael eu hamddiffyn yn gyfreithiol gan eu credydwyr; gan gynnig cyfle arall iddynt ddod atynt eu hunain unwaith y caniateir i'r darpariaethau ddod i ben.
- Ceir enghreifftiau cadarnhaol o ddeialog adeiladol rhwng tenantiaid a landlordiaid.
- Bwriadwyd i'r darpariaethau fod yn fesur brys.
- Mae effeithiau gwahaniaethol ar wahanol sectorau.
- Dylai gweithredoedd Llywodraeth y DU a Gweinyddiaethau Datganoledig eraill mewn perthynas â'r darpariaethau hyn fod yn ffactor pwysig mewn ystyriaethau.

Bydd y pryderon sy'n cael eu codi gan randdeiliaid yn ganolog i ddatblygu safbwyntiau o ran polisi ac yn llywio trafodaethau gyda Llywodraeth Cymru ar y mater hwn.

## **7. Asesiad o'r Gystadleuaeth**

Ar ôl cwblhau'r prawf Hidlo Cystadleuaeth, penderfynwyd nad oes unrhyw effeithiau ar gystadleuaeth.



## 8. Adolygiad ôl-weithredu

Mae effaith y Rheoliadau hyn yn gyfyngedig o ran amser a bydd y sefyllfa'n cael ei hadolygu cyn dyddiad terfyn arfaethedig yr estyniad, sef 30 Mehefin 2021.

## 9. Atodiad

### Mesur y data

Mae'r Arolwg Effaith y Coronafeirws (COVID-19) ar Fusnes yn wirfoddol a dim ond nodweddion y rhai hynny a ymatebodd sy'n cael eu hadlewyrchu; mae'r canlyniadau yn arbrofol.

**Tabl 1. Sampl a chyfradd ymateb ar gyfer Tonnau 9, 10 ac 11 o'r BICS**

Ton	Cyhoeddiad 28 Ionawr 2021 Ton 22	Cyhoeddiad 11 Chwefror 2021 Ton 23	Cyhoeddiad 25 Chwefror 2021 Ton 24
<b>Sampl</b>	38,831	39,418	38,278
<b>Ymateb</b>	10,325	10,008	10,351
<b>Cyfradd</b>	26.6%	25.4%	26.4%

Ffynhonnell: Y Swyddfa Ystadegau Gwladol – [Arolwg Effaith y Coronafeirws \(COVID-19\) ar Fusnesau](#)

### Ton 23

Mae'r canlyniadau'n seiliedig ar ymatebion gan y BICS gwirfoddol, bob pythefnos, sy'n casglu barn busnesau ar berfformiad ariannol, gweithlu, prisiau, masnach a gwydnwch busnes. Roedd arolwg Ton 23 yn fyw ar gyfer y cyfnod rhwng 25 Ionawr a 7 Chwefror 2021. Ar gyfer cwestiynau ynglŷn â'r pythefnos diwethaf, gofynnwyd i fusnesau am eu profiad ar gyfer y cyfnod cyfeirio rhwng 11 a 24 Ionawr 2021.

Mae amcangyfrifon wedi'u pwysoli ar gyfer y BICS bellach wedi'u datblygu ar gyfer pob newidyn a gesglir ar lefel y DU. Mae disgrifiad manwl o'r fethodoleg bwysoli a'i gwahaniaethau i amcangyfrifon heb eu pwysoli ar gael yn Arolwg Effaith Busnes Coronafeirws (COVID-19): canlyniadau rhagarweiniol wedi'u pwysoli.

Ar hyn o bryd mae ONS yn darparu amcangyfrifon heb eu pwysu gyda rhaniad gwlad a rhanbarthol ar gyfer newidynnau dethol yn y set ddata ategol. Dylid trin y rhain yn ofalus gan mai dim ond y rhai sydd wedi ymateb i'r arolwg sy'n cael eu cynrychioli, ac felly nid yw'r rhain yn gwbl gynrychioliadol o'r DU gyfan. Pan nad yw'n cael ei bwysoli, mae pob busnes yn cael yr un pwysau waeth beth fo'i drosiant, ei faint neu ei ddiwydiant, ac nid yw busnesau nad ydynt wedi ymateb i'r arolwg neu nad ydynt yn cael eu samplu yn cael eu hystyried.

Ar 1 Chwefror 2021, cyhoeddwyd amcangyfrifon rhanbarthol arbrofol wedi'u pwysoli hyd at Don 21 (28 Rhagfyr 2020 i 10 Ionawr 2021) [yn Deall effeithiau busnes cyfyngiadau lleol a chenedlaethol: Chwefror 2021](#), fel rhan o'r Adolygiad Economaidd.

## Ton 24

Mae'r canlyniadau'n seiliedig ar ymatebion gan y BICS gwirfoddol, bob pythefnos, sy'n casglu barn busnesau ar berfformiad ariannol, gweithlu, prisiau, masnach a gwydnwch busnes. Roedd arolwg Ton 24 yn fyw ar gyfer y cyfnod rhwng 8 a 21 Chwefror 2021. Ar gyfer cwestiynau ynglŷn â'r pythefnos ddiwethaf, gofynnwyd i fusnesau am eu profiad ar gyfer y cyfnod cyfeirio rhwng 25 Ionawr a 7 Chwefror 2021.

Yn seiliedig ar adborth gan ddefnyddwyr, mae'r arolwg hwn wedi newid ei enw i'r "Arolwg o Fewnwelediadau ac Amodau Busnes" (BICS) o Don 24 (y don hon) ymlaen.

Mae'r diben yn aros yr un fath, i gasglu gwybodaeth amser real am faterion pwysig fel pandemig y coronafeirws (COVID-19) a diwedd cyfnod pontio'r UE.

Mae amcangyfrifon wedi'u pwysoli ar gyfer y BICS bellach wedi'u datblygu ar gyfer pob newidyn a gesglir ar lefel y DU. Mae disgrifiad manwl o'r fethodoleg bwysoli a'i gwahaniaethau i amcangyfrifon heb eu pwysoli ar gael yn Arolwg Effaith Busnes Coronafeirws (COVID-19): canlyniadau rhagarweiniol wedi'u pwysoli.

Ar hyn o bryd mae ONS yn darparu amcangyfrifon heb eu pwysu gyda rhaniad gwlad a rhanbarthol ar gyfer newidynnau dethol. Dylid trin y rhain yn ofalus gan mai dim ond y rhai sydd wedi ymateb i'r arolwg sy'n cael eu cynrychioli, ac felly nid yw'r rhain yn gwbl gynrychioliadol o'r DU gyfan. Pan nad yw'n cael ei bwysoli, mae pob busnes yn cael yr un pwysau waeth beth fo'i drosiant, ei faint neu ei ddiwydiant, ac nid yw busnesau nad ydynt wedi ymateb i'r arolwg neu nad ydynt yn cael eu samplu yn cael eu hystyried.